

## Von den Wilden Killen/ ihrer Art vnnnd Eigenschaft.



**D**ennach viel Hasen gefunden werden/ wie oben vermeldt / die sich mit den wilden Killen vermischen/ vnd ihnen bey nahe gar gleich seyen/ so ist von nöthen/ daß auch ein wenig von ihnen angezeigt werde. Vnd ist diß Wildpret sehr nützlich zur Haushaltung/ vnd macht inen ihren Baw selbst. Nur allein sol man achtung geben/ daß ihre Wohnung an einem feinen trucknen/ leitmächten/ oder sandechten Ort vnd Berglein/ weit von Wassern bey den Fruchtfeldern vnd Wälden/ angestellt werde/ denn das Killen ist der Nässe vnd Kälte zuwider/ vnd mag dieselbige gar nicht leiden noch dulden/ vnd muß ein Erden haben/ daß es leichtlich vnd ohne mühe bawen möge/ dasselbige Ort sol geaen der Sonnen stehen/ vnnnd umbmauert seyn/ damit die Wölffe/ Füchß/ vnd andere wilden Thier ihnen keinen schaden zufügen/ vnd darumb gepflanzt werden viel Brombeern/ Kräuselbeern/ wilde Pflaumen/ Erdbeern/ Gemise/ Dornhecken/ Wachholder/ denn das Killen liebet vor allen dingen die Wachholder/ vnd solt darein säen viel Erbsen/ Linsen/ Lattich/ vnd dergleichen/ Sie brauchen kein Wasser noch Feuchte / auch bauwen sie ihnen selbst/ vnd darff dieser beyder stück halben kein sorg nicht.

Da du aber anfänglich wilt ein Garenne bauwen/ soltu anfangen vnd etliche klein beschlosssen Häußlin/ mit Bretttern beschlagen/ machen/ vnd die Männlin darein einbeschliessen/ damit sie den jungen keinen schaden zufügen ( Denn diß Thierlin wider natur/ art vnd eigenschaft aller anderer / er würget seine Jungen/ vnd frist sie ) Vnd solt derhalb / als bald das Killen gesetzt / es von den Jungen hinweg nemen/ vnd zu den Männlin thun / so wirt es von stundan widerumb gefüllt/ vnd setz alle Monat auch vnangesehen/ es gefüllt/ so läst es nicht desto weniger das Männlin zu/ vnd füllt sich zum andern mal/ vnd setz hernacher zu gelegener zeit wider. Darumb/ auß dieser irer Fruchtbarkeit gefolget/ dz etliche vnverständige gemeint haben/ die Männlin setzen auch den Weib im gleich/ welches doch falsch/ vnd der Natur zuwider/ vnd das Weiblin vnd Männlin in solchem vnterschieden ist.

Du magst auch dessen/ wie angehört/ dich mässigen/ vnd die Killen/ wilder Art nach/ vnein beschlosssen/ ihre sachen selbst in der Garenne verrichten lassen. Aber da ist der fehl / daß sie nicht so oft/ sondern des Jars nur drey oder vier mal/ vnd die einbeschlossene alle Monat setzen/ Ir Weyd ist/ wie gesagt/ Vnd doch / wenn der Killen viel vnd vbersetzt seyn wolten/ so möchstu in die Garenne Gersten oder Habern säen lassen.

Der wilden Killen Weyd ist kein andere/ denn auch diejenige / welche wir vor allbereit angezeigt haben. Jedoch/ wenn du siehest/ daß der Killen allzu viel werden/ soltu/ damit sie sich desto besser erhalten/ ein Zuchart felds mit Gersten oder Habern besäen / nicht der meinung / daß du solche Frucht